

# Is Nehuna He Surat Ni Epustul Pablo Ziyà Te Menge TigTiselunika

## Is Mehitenged te Nehuna he Surat he Para te TigTiselunika

Keenu edlikù si Jesus? Egkemenumenu heini? Egkemenumenu is дума tew he menge tumutuu he nemematey en, hengkey is egkehitavù kandan dutun te kedlikù ni Jesus? Egkengelivegan is menge tumutuu ziyà te Tiselunika. Netuenan dan he edlikù si Jesus su iyan heini impenurù ni Pablo kandan hein diyè pa sikandin te kandan.

Is menge tumutuu ziyà te Tiselunika mibpesipelahan tenged te kedtuu zan ki Jesu Kristu. Umba meinit is kebperetenga zan te kedlikù ni Jesus su egkesuat dan he metapus en is menge samuk dan su ed-uwiten en man sikandan diyà te langit. Ne zutun te kedtagad dan, kinahanglan gihapun he edesigen sikandan.

Ne utew nehizuwi ni Pablo is дума zin he menge tumutuu ziyà te Tiselunika. Iyan sikandin nehuna he nekepenurù kandan mehitenged ki Kristu, ne hein nemeketuu en sikandan mid-isip din sikandan he menge anak din. Iring sikandin te iney zan he mid-elima kandan wey iring daan sikandin te amey zan he midsambag kandan, midasig kandan wey nenurù kandan. Ne umba mibpesuratan din sikandan su edesigen din sikandan he mibpedayun dan he edsarig te Nengazen minsan pa ke egkeumahan sikandan te kemeregenan. Ne is mehitenged duen te igkelivegi zan he kedlikù ni Jesus, ne nekagi ni Pablo he is menge sakup ni Jesus he nemematey en ebenhawen din dutun te kedlikù din ne is menge uuyag pa egkengevatun ne ebpeketelavuk ki Jesus diyà te zivavew. Nekagi zaan ni Pablo he utew kinahanglan is layun kebpengandam su wazà netau ke keenu edlikù si Jesus.

Ne zuen pa zuma he menge ulaula he ibpeulaula ni Pablo te menge tigTiselunika. Duen дума kandan he mid-engked en he edterebahu su egkeisip dan he hapit en daan edlikù si Jesus. Ne midsembagan din sikandan he mebpenigudu sikandan he edterebahu. Duen дума he netintal te kebaal te meremerik he menge vaal ne mibpetizeenan din sikandan he engkezi zan haazà. Midsugù din daan sikandan he kenè dan ewaa ziyà te gehinawa zan is

kebminahalà su wey zan mebmelipayen wey kenè dan egena is baal te Wagas he Mulin-ulin.

Is puunà te vaal ni Pablo ziyà te Tiselunika egkevasa ta ziyà te Nengeulaula 17:1-9.

**1** <sup>1</sup>Sikami si Pablo, si Silas, wey si Timoteo, ebpesuratan dey sikiyu is menge tumutuu he menge tigTiselunika he gaked te Amey tew he Megbevayà wey gaked te Nengazen tew he si Jesu Kristu.

Berakat he ikegagew kew te Megbevayà ne vegayi kew zin te melinawen he kebpekesavuk.

### Is Kedtuu te Menge TigTiselunika

<sup>2</sup>Dekelà layun is kebpelemati zey te Megbevayà tenged keniyu ne layun dey sikiyu id-ampù. <sup>3</sup>Su emun ed-ampù key te Megbevayà he Amey tew kenè dey egkelipatan is kedtuu niw, wey is kebmahala niw, wey is kebperateng niw te Nengazen tew he si Jesu Kristu. Su egketuusan is kedtuu niw kandin pinaagi te ulaula niw, ne pinaagi te kedhagù niw egketuusan daan is kebmahala niw kandin diyà te gehinawa niw. Ne egketuusan daan is kebperateng niw kandin pinaagi te kebmeinentusen niw. <sup>4</sup>Ne menge suled he minahal te Megbevayà, netuenan dey he pinili kew zin <sup>5</sup>su impesavut dey keniyu is Meupiya he Tudtulanen, kenà pinaagi te lalag dey zà, kekenà, pinaagi te gehem te Wagas he Mulin-ulin. Midheget te Megbevayà dutun is kedsevuta zey kayi. Ne netuenan niw zaan ke hengkey is menge ulaula zey he meupiya wey kew mezeyzey hein diyan key te keniyu. <sup>6</sup>Ne sikiyu zaan, mid-iringan niw is mid-ulaula zey wey is mid-ulaula zengan te Nengazen tew he si Jesus su midawat niw is Lalag te Megbevayà minsan nekeagi kew te kemeresayan tenged te kedawat niw. Ne minsan pa te nerasey kew, nelipey kew zed tenged te ked-ulini keniyu te Wagas he Mulin-ulin. <sup>7</sup>Tenged kayi iyan kew ed-iringan te langun he menge zuma he tumutuu ziyàn te prubinsya he Mesidunya wey ziyà daan te prubinsya he Gerisya. <sup>8</sup>Ebpuun diyan nekeeneb is Lalag te Nengazen, kenà diyan dà te prubinsya he Mesidunya wey ziyà te prubinsya he Gerisya, kekenà, is menge etew ziyà te minsan hendei, nezineg dan is tudtul mehitenged te kedtuu niw te Megbevayà. Wazè en kinahanglan he ibpenudtul zey pa ziyà te menge etew is kedtuu niw. <sup>9</sup>Nezineg dan en ne iyan sikandan ebpenudtul mehitenged te kegelgelawa niw kenami. Ebpenudtul zan he mid-engkezan niw kes ked-azap te menge kenà tutuu he ed-ezapen. Mid-engkezan niw kun wey kew mekeazap te tutuu he Megbevayà he wazè din kemetayen. <sup>10</sup>Su edtegazan niw kun is kedlikù te Anak din he ebpuun te langit. Iyan si Jesus he Anak te Megbevayà he mibanhew zin. Iyan si Jesus he midlibri kenitew te silut wey kiw mekeliyu te ebpekeuma he kedlimasa te Megbevayà te menusiya.

## Is Kebpenurù ni Pablo

**2** <sup>1</sup>Menge suled, netuenan niw en he mibpulus is kedhendiyan dey te inged niw. <sup>2</sup>Su wazè niw melipati is nehitavù kenami ziyà te inged he Pilipus hein wazè key pa mekeuma ziyàn te Tiselunika. Wazè key zan urami te kebpemugel wey te kebbeelimungawi. Ne minsan pa zutun, tenged te kedtawang te Megbevayà wazè key mahandek he ebpenudtul ziyàn te keniyu te Meupiya he Tudtulanen he ebpuun diyà te kandin, iyan, neregenan key utew. <sup>3</sup>Is kedwali zey ziyà te menge etew, ne kenà ebpuun te sayep wey te meremerik he tuyù. Kenè key edtarùtarù te minsan hentei. <sup>4</sup>Nezawat key te Megbevayà ne insarig din kenami is kebpesavut te Meupiya he Tudtulanen, ne tenged kayi ebpenudtul key. Kenè dey iyan tuyù is kebpenunuata te menge etew su iyan tuyù dey is kebpenunuata te Megbevayà. Iyan sikandin metau he ebpenggezam kenitew wey metueni he hustu is tuyù dey. <sup>5</sup>Netuenan niw he kes menge lalag dey, kenà kedigdìg dà. Kenà ibpenapì kes mid-ulaula zey ziyàn. Is Megbevayà, iyan ebpeketistigus kayi. <sup>6</sup>Wazè key mebbepezalig keniyu; wazè key zaan mebbepezalig te zuma. Geina te menge epustul key ni Kristu, egkehimu he edsugùsugù key zaan keniyu, iyan, wazè dey heini ul-ulaha. <sup>7</sup>Mibpurungan dey sikiyu; iring key te iney he metulanged te menge anak din. <sup>8</sup>Uteu kew mahal kayi te gehinawa zey, umbà kenà iyan dey zà egkesuatan is kedweliyi zey keniyu te Meupiya he Tudtulanen he ebpuun te Megbevayà, kekenà, ebpekid-uunungen key en daan keniyu su utew zey sikiyu minahal. <sup>9</sup>Menge suled, kenè niw vuwa egkelipatan is kedhagù dey ziyàn te kebaal. Su hein impesavut dey keniyu is Meupiya he Tudtulanen he ebpuun te Megbevayà, mibpenigudu key zaan medhagù te maandew se mezukilem wey key mekekuwa te keuyagan dey wey key kenà mekesamuk keniyu.

<sup>10</sup>Ebpeketistigus kew, ne ebpeketistigus daan is Megbevayà he hein diyan key te keniyu te nemeketuu wazà igkesewayi te menge ulaula zey, kekenà, metazeng key wey metinumanen key te egkesuatan te Megbevayà. <sup>11</sup>Netuenan niw he is mid-ulaula zey ziyà te kada sevaha keniyu, ne meupiya su iring te ed-ul-ulahan te amey ziyà te menge anak din. <sup>12</sup>Midsembagan dey sikiyu; iyan key midlangan te gehinawa niw ne midhengyuan dey sikiyu he med-ulaula kew te sungkad te egkesuatan te Megbevayà. Iyan sikandin midhimu keniyu he tumutuu wey kew zin mehedii wey kew tulusa.

<sup>13</sup>Ne elin daan layun dey ibpeselemati te Megbevayà is: hein impesavut dey keniyu is Lalag te Megbevayà, midawat niw su nesavut niw he Lalag te Megbevayà ne kenà lalag te etew zà duen. Su pinaagi te lalag din egkelig-enan is kedtuu tew te nemeketuu kandin. <sup>14</sup>Kes menge gaked te Megbevayà he ziyà te prubinsya he Hudiya he menge tumutuu ki

Jesu Kristu, neiringan niw sikandan. Su iring te kedresaya kandan te minge zuma zan he Hudiyu, midrasey kew zaan te minge zuma niw he kenà minge Hudiyu. <sup>15</sup>Is minge Hudiyu, iyan kes midhimatey te ebpemeneuven te Megbevayà dengan wey te Nengazen tew zaan he si Jesus. Ne mid-avug key zan daan. Utew supak is minge ulaula zan te egkesuatan te Megbevayà, <sup>16</sup>ne iring te egkuntedahan dan is tivuuk he menusiya, su edsemuken key zan wey zey kenà ikesangyew is Lalag te Megbevayà he igkelibri te silut te minge etew he kenà minge Hudiyu. Ne eppeniguduwan dan te ebaal is taman te egkehimu zan he salà. Ne guntaan in-andam en is silut kandan te Megbevayà.

### Is Kebulunga ni Pablo

<sup>17</sup>Ne sikami, minge suled, hein neewaan dey sikiyu seled te megaan dà, wazè dey sikiyu melipati, kekenà, utew key ebulunga keniyu ne layun key pezem egkesuat he ebpenumbaley ziyàn. <sup>18</sup>Ne tenged kayi layun dey egkeisip he edlikù key pezem diyan te Tiselunika. Siak si Pablo, layun ku egkeisip is iring dutun, iyan, mibangen key ni Setanas, umba wazè key mekelaus. <sup>19</sup>Umba egkesuatan ku he ed-uman a ebpenumbaley ziyàn su tenged keniyu utew meheget is kebperetenga zey te kedlikù ni Jesus su iyan kew igkelihey zey. Tenged keniyu kenè key egkeeled keuzemà, kekenà, igkezantal zey is kedtuu niw emun ed-etuvang kiw ki Jesus dutun te kedlikù din. <sup>20</sup>Uya, iyan kew iyan igkezantal zey; iyan kew igkelihey zey.

**3** <sup>1</sup>Ne hein kenè dey en egkeantus is kebulunga zey keniyu, sikami is tetelu, mid-isip dey he meupiya ke ebpetagak is dezuwa kenami ziyà te inged he Etinas. <sup>2</sup>Ne zutun midsugù dey ziyàn si Timoteo he suled tew wey suluguen daan te Megbevayà te kegkesengyawa te Meupiya he Tudtulanen mehitenged ki Kristu. Iyan insugua zey kandin su wey zin mehegeti is kedtuu niw ne wey kew zin mesembagi <sup>3</sup>su wey kenà meliveg is minsan hentei keniyu tenged te kebpesipelahi keniyu te minge etew. Netuenan niw en he sikitew is tumutuu, imbanglis kenitew te Megbevayà is kemeresayan. <sup>4</sup>Hein diyan key pa te keniyu migkegiyan dey sikiyu he zuen timpu he egkeumahan kiw te kemeresayan, ne netuenan niw guntaan he netuman en. <sup>5</sup>Ne tenged kayi hein kenè ku en egkeantus is kegkeipeng ku keniyu, midsugù ku ziyàn si Timoteo wey ku metueni ke nenumenu en is kedtuu niw. Nahandek a su kela ke nepenulayan kew ni Setanas ne naawà is pulus te kedhagù dey ziyàn te keniyu.

### Is Tudtul ni Timoteo

<sup>6</sup>Ne iyan pa kebpekeuma ni Timoteo he ebpuun diyan te Tiselunika. Ne meupiya is tudtul zin he mezesen ded is kedtuu niw te Megbevayà wey ebmahalen niw zaan diyà te gehinawa niw is minge zuma niw. Ne iyan

daan tudtul zin is: utew meupiya is gehinawa niw kenami, ne ebulungen kew kenami iring te kebulunga zey zaan keniyu. <sup>7</sup>Ne tenged kayi, menge suled, minsan neseeng key wey nemeregenan key, utew key nelipey tenged keniyu wey tenged te kedtuu niw. <sup>8</sup>Ne guntaan mibmeupiya en utew is kebpekesavuk dey su netuenan dey en he mezesen ded bes is kedtuu niw te Nengazen. <sup>9</sup>Kenè pa hustu is kebpenigudu zey kebpeselamat te Megbevayà tenged keniyu, su utew zey sikiyu ingkelipey. Iyan ebpektistigus kayi is Megbevayà. <sup>10</sup>Su maandew wey mezukilem ebpenigudu key ed-ampù he itugut din he memeked-uuma kiw en maan wey zey meheget is kedtuu niw ke zuen din kurang.

<sup>11</sup>Berekati te Amey tew he Megbevayà wey te Nengazen tew he si Jesus he megaan key mekehendiyan te keniyu. <sup>12</sup>Berekati te Nengazen he med-iseg is kebmahala niw ziyà te gehinawa niw te uman sevaha keniyu wey is langun he etew, iring te utew mezesen is kebmahala zey keniyu. <sup>13</sup>Berekati zin daan he mebmelig-en kew te kedtuu niw su wey wazà igkesewayi keniyu te menge gaked te Megbevayà emun diyè kew ed-etuvang te Amey tew he Megbevayà dutun te kebpekeuma te Nengazen tew he si Jesus he edumahan te langun he tumutuu kandin.

### Is Meupiya he Betasan

**4** <sup>1</sup>Ne guntaan, menge suled, tenged te kegkesevaha tew te Nengazen tew he si Jesus, duen ebuyuen dey wey edhengyuen dey ziyen te keniyu. Impenurù dey keniyu is ed-ul-ulahan he egkesuatan te Megbevayà, ne mid-ulaula niw en. Iyan, edhengyuen dey keniyu he ipeiseg niw pa is ked-ul-ulaha niw kayi. <sup>2</sup>Netuenan niw is insugù dey keniyu he ebpuun te Nengazen tew he si Jesus. <sup>3</sup>Iyan egkesuatan te Megbevayà is: kinahanglan he zait is menge ulaula niw te etew he gaked din. Kinahanglan he kenè niw hileveti is kenè niw esawa. <sup>4</sup>Kinahanglan he is uman sevaha keniyu te menge maama, ne mebpengesawa te paagi he meupiya wey kenà meremerik, <sup>5</sup>ne kenà tenged te egkeveyveyaan sikandin te saat te lawa zin, su iyan heeyan egkeulaula te menge etew he wazà medtuu te Megbevayà. <sup>6</sup>Kinahanglan he wazà minsan hentei he ebpekesalà wey ed-akal te zuma zin pinaagi te menge ulaula he iring kayi. Su edsilutan te Megbevayà is ed-ulaula te iring dutun. Heini impurung dey ipenurù keniyu. <sup>7</sup>Su nehimu kiw te Megbevayà he menge tumutuu kandin su wey mehimu is menge ulaula tew he zait te etew he gaked din. Kenà iyan din egkesuatan he meremerik is menge ulaula tew. <sup>8</sup>Emun ebpesegdanen niw heini is penurù ku keniyu, kenè niw iyan dà egkepesagdan is penurù te etew, kekenà, iyan niw egkepesagdan is penurù te Megbevayà. Iyan sikandin kes mibegey kenitew te Wagas he Mulin-ulin.

<sup>9</sup>Ne wazè en kinahanglan he ibpenurù ku pa keniyu he mahala niw ziyà te gehinawa niw is menge zuma niw he tumutuu su impenurù

en heini keniyu te Megbevayà. <sup>10</sup>Netuenan ku he ebmahalen niw en is minge tumutuu ziyà te tivuuk he prubinsya he Mesidunya. Ne edhengyuan dey pa sikiyu, minge suled, he ipeiseg niw pa is kebmahala niw ziyà te gehinawa niw te langun. <sup>11</sup>Ne kenà duen dà taman su iyan layun pen-ahaa niw is melinew he kebpekesavuk. Tegtegami te uman sevaha is kandin dà he vaal. Medhagù sikandin wey zin mekuwa is igkeuyag din. Daan heini he insugù dey keniyu. <sup>12</sup>Ne emun ebeelan niw heini edtehuzen kew te minge etew he kenè pa tumutuu, ne zutun kenè en daan kinahanglan he ebpekevuyù kew te igkeuyag niw ziyà te minsan hentei.

### Is Kedlikù te Nengazen

<sup>13</sup>Minge suled, egkesuatan dey he metueni niw is egkeulaula te minge tumutuu he minatey en su wey kew kenà meseeng iring te kegkeseeng te zuma he minge etew he kenè dan egkeperateng he egkevanhew sikandan. <sup>14</sup>Midtuu kiw he mibpatey si Jesus ne nevanhew ne edlikù keuzemà. Iring din daan kes minge tumutuu he minatey en su ebhawanen ne ibpezuma sikandan te Megbevayà ki Jesus keuzemà te kedlikù din.

<sup>15</sup>Lalag en te Nengazen heini is egkegiyen dey keniyu ne iyan is: sikitew is uuyag pa keuzemà te timpu te kedlikù te Nengazen, kenè kiw egkehuna te minge tumutuu he minatey en. <sup>16</sup>Su ebpuun te langit ebpenaug is Nengazen he edtawag kenitew, ne egkezineg tew is ked-umew te lavew he velinsuguen te Megbevayà wey is budyung he ibpezaging te Megbevayà. Ne egkehuna egkevanhew is minge tumutuu ki Kristu he nemematey en. <sup>17</sup>Ne human kiw is minge uuyag pa, ebpekezuma kiw zaan kandan diyà te minge gapun su edtelavuk kiw te Nengazen diyà te zivavew. Ne zutun kenè kiw en ebpekesuwey te Nengazen te wazà pidteman. <sup>18</sup>Umba ipedlilipayè niw heini is egkegiyen ku.

**5** <sup>1</sup>Minge suled, kenè en kinahanglan he edseysayen dey pa keniyu kayi te surat is minge andew wey minge timpu te kegketuman kayi te minge midtagnà. <sup>2</sup>Su netuenan niw en he iring te tekawen he ebpekeuma ke mezikilem is kegketuman te andew te kedlimas te Nengazen, su egketingkemed is menusiya. <sup>3</sup>Ne egkehitavù te timpu he kunaan te minge etew ke melinew is langun wey nelig-enan sikandan. Ne segugunà dutun egkegerà sikandan. Utey megaan; iring te kedlepew te velilit diyà te ed-anak. Ne wazà edresik dutun he minsan sevaha. <sup>4</sup>Ne sikiyu, minge suled, wazè kew mulà diyà te merusirem. Kenè kew mulà egkengetingkemed te andew te kedlimas te Nengazen iring te egkengetingkemed is minge etew te tekawen. Kenè kew iyan iring dutun. <sup>5</sup>Su sakup kew mulà te merayag wey te maandew, *he ke và dà egkegiya, sakup kew te Megbevayà. Su sikitew, wazè tew kelavet te merusirem wey*

*kezukileman.* <sup>6</sup>Umba kinahanglan he kenà iring te kedlizepeng is ulaula tew su iring kayi is ulaula te zuma he etew he wazà meketuu. Kinahanglan he ed-andam kiw ne ed-egenen tew is menge mezaat he suat tew. <sup>7</sup>Sikan is edlizepeng, edlizepeng te mezukilem, ne sikan is egkelangut, egkelangut daan te mezukilem. <sup>8</sup>Iyan, sikitew mulà is nesakup te maandew, kinahanglan he ed-egenen tew is menge mezaat he suat tew. Idsun-ud tew is limbutung he iyan is kedtuu tew te Megbevayà wey is kebmahala tew zini te gehinawa tew te menge zuma tew. Ne iring te kalù tew te sundaru is kedhemeni tew te kebperateng tew te kedlibriya te Megbevayà kenitew te silut. <sup>9</sup>Su is Megbevayà, wazè din ivanglis kenitew is silut, kekenà, midluwas kiw zin pinaagi te Nengazen tew he si Jesu Kristu. <sup>10</sup>Ne minsan ke uuyag kiw pa wey ke minatey kiw en be zutun te kedlikù ni Kristu, duen tew en gihapun untung he wazà pidtemanan duma kandin su iyan heini ketezengan ke maan is mibpehimatey sikandin. <sup>11</sup>Ne geina te netuenan niw en heini peliplipayè kew ne lig-eni niw is kedtuu te uman sevaha keniyu, iring te neveelan niw en.

### Menge Pengemusta

<sup>12</sup>Ne menge suled, sikan is edhagù te ked-uwit dan keniyu, kes menge egalen niw he mibpili te Nengazen wey sikandan is ebpnurù keniyu, edhengyuan dey sikiyu he tehuza niw sikandan. <sup>13</sup>Kinahanglan he utew niw sikandan tehuza wey mahala tenged te menge vaal zan diyan te keniyu. Ne kinahanglan he melinew is kedepitè niw te kada sevaha.

<sup>14</sup>Ne iyan daan idhangyù dey keniyu, menge suled, is: kegiyi niw is menge pegulen he medterebahu zan. Sembagi niw is egkengehandek, lig-eni niw is menge meguyà is kedtuu, ne kinahanglan he mebmepelevayen kew te langun kandan. <sup>15</sup>Kenè niw itugut he zuen minsan hentei keniyu he ebales te mezaat, kekenà, mebpepurpurungè kew layun. Purungi niw zaan is minsan hentei he etew.

<sup>16-18</sup>Ne geina te nekidsevaha kew ki Jesu Kristu, iyan ebpeveelan keniyu te Megbevayà is: layun kew medlipey, layun kew med-ampù, wey layun kew mebpeselamat te Megbevayà minsan hengkey is egkeulaula niw.

<sup>19</sup>Kenè niw verawa is menge sugù keniyu te Wagas he Mulin-ulin. <sup>20</sup>Kenè niw pesegdana is menge lalag te mid-ulinan, <sup>21</sup>kekenà, gezami niw is langun ne tipigi niw is meupiya. <sup>22</sup>Likayi niw is minsan hengkey he mezaat.

<sup>23</sup>Is Megbevayà, ne iyan ebegey te kelinew, berakat he purungi zin lumpiyuwi is ulaula niw. Lig-eni zin is tivuuk he gehinawa niw, isip niw, wey lawa niw su para wazà igkesewayi keniyu keuzemà te kedlikù te Nengazen tew he si Jesus. <sup>24</sup>Ne edhimuwen heini te Megbevayà su iyan

sikandin midhimu keniyu he minge tumutuu kandin ne egkeserigan sikandin.

<sup>25</sup>Menge suled, iampù key zaan keniyu.

<sup>26</sup>Pengemustaha niw te limù is langun he minge suled tew ziyàn.

<sup>27</sup>Ibegey ku keniyu is sugù te Megbevayà he vesaha niw heini is surat diyà te langun he minge suled tew ziyàn.

<sup>28</sup>Ikegegawi kew te Nengazen tew he si Jesu Kristu.